

)(2^r

Dem gũnftigen Lefer.
 WEnn wir der alten
 Weifen/ Philofophen/
 vñ anderer hochgelerten
 Scribenten Schrifften
 vnd Bücher/ fo fie den
 Nachkoñnenen verlaſſen/ vñ damit einen
 vnſterblichen Nañen bekommen/ fleißig
 durchſehen/ vnd beuorab/ weißhalben fie
 ſich folcher mühe vnd arbeit vnderwun=
 den/ vnd der gantzen gemeine nũn mit le=
 ren/ nũn mit ſchreiben/ fo trewlich vorge=
 ftanden/ vnd hierinn an jrem fleiß nichts
 erwindẽ laſſen/ etwas jñnerlicher betrach=
 ten/ vnd jhm nachgedencken/ müſſen wir
 ohne alles widerreden/ frey vnd öffentlich
 bekennen/ folche jre Schrifften vnd Leren
 feyen fonderlich von Gott/ vns vnd dem
 gemeinen Chriftlichen nutzen zũ gũtem/
 erhalten/ vnd auß dem tunckeln/ dariñ fie
 im ftaub vnd vndern bencken veracht vnd
 verftoffen gelegen/ ins liecht vnd an tag
)(ij wider

)(2^v

Dem gũnftigen
wider kommen vnd herfür bracht. Denn
ob sie wol selber nicht Christen gewesen/
auch nicht haben sein können/ dieweil sie
der zeit/ da der ware Gott der Welt noch
vnbekant/ vnd noch nicht auff erden kom=
men/ vnd allein bey den Juden die ver=
heißung auff den künftigen Messiam
ftunde / gelebt/ vnd nicht in vnser felige
gnadenzeit geraten seind/ Haben sie doch
solche Lere jeder zeit getrieben/ vnd hinder
ihnen in schriftten verlassen/ deren wir nit
one groffe vnordnung vnd schaden vnse=
rer sachen entrahten können. Ja weyß nit
ob auch bey vns Christen (das ich doch
ohne nachtheil anderer frommen Gotts=
gelerten gefagt wil haben/ deren wir jetzi=
ger zeit / Gott lob / auch viel haben) solche
treffliche fürnemme Männer erfunden
werden/ die also der Philofophey/ weiß=
heit/ tugenden vnd freyen künften nachse=
tzen vnd trachten/ vnd besonder dem hö=
heften Gut/ Summo bono, (das ich aller
anderer gũtthatē vns von jnen fürgelegt /
geschwei=

)(3^r

Lefer.

gefchweige/ vñ in welches erfuchung vnd
 ergründung fie allen fleiß hingefetzt / vnd
 aber vns nún oben herab vom Himmel
 offenbart/ vnd durch vnfern Herrn Chri=
 ftum zú erkennen geben) nachforfchen.
 Jch rede aber allhie von denen/ welche
 ewere fchrifften dahin gefteilt vñ gericht/
 das fie allerhandt Regiment im menfch=
 lichen wolftand zú erhalten/ Land vñ Leut
 in güter Policey/ Burgerlichen vnd ge=
 bürlichen Rechten zú regieren/ vnd alle
 Stende menfchliches gefchlechts in aller
 erbarkeit/ tugenden vnd gehorfam zú er=
 ziehen/ leren vnd vnterrichten. Wil die
 andern/ fo etwan folche ding gefchrieben/
 die wol mehr zú aller leichtfertigkeit vnd
 vppigkeit reitzen vnd bewegen/ denn zú
 zucht vnd güten gebürlichen fitten anley=
 tung gebẽ / hiemit keinerley weiß gemeint
 haben. Wil fie auch viel weniger vns in
 Glaubens fachen vergleichen/ gegen wel=
 chem alle Menfchliche vernunft/ weiß
 vnd klügheit/ für lauter vnwitz vnd narr=
)(iij heit

)(3^v

Dem günstigen
 heit zů erachten/ welches ein jeder verften=
 diger für sich felbs wol kan erachten vnd
 abneñen. Vnder denen aber so also dem
 gemeinen nutzen beyde mit lehren vnn
 schreiben vorgestanden/ vnd sich der Phi=
 lofophey/ weißheit/ vnd aller tugenden/
 gůter fitten/ vnd freyen kúnften am mei=
 ften vnd vor andern befliffen/ auch die be=
 fte meinung vnd verftandt von dem hõ=
 heften Gůt / erfůchung vnd erkenntnuß der
 Philofophey oder Weißheit/ vnd aller er=
 barlichen gebůrlichen Wercken/ gehabt/
 feind nicht für die geringfte/ fondern alle
 zeit für die fürnemeſte vnd fürtrefflichſte
 gehalten worden Socrates/ Plato / Ari=
 ftoteles / Cicero / vnd etliche mehr/ deren
 einer nach dem andern kommen/ welche
 alle hie zů ſetzen/ vil zů lang/ vñ nicht mei=
 nes vorhabens/ were. Zwar von Socrate
 wiſſen wir/ das er ſo ein thewrer vnd wer=
 der Philofophus gewefen/ das feiner zeit
 nicht baldt einer/ der jhm zů vergleichen/
 funden wordē. So ein (mags wol ſagen)
 Göttlich/

)(4^r

Lefer.

Göttlich / heilig vñ erbar leben/ hat er ge=
 furt / fo fleißig dem grundt der Weißheit
 nachgefucht/ fo trewlich dem gemeinen
 nutzen mit feiner lere/ vnd rath vorgeftan
 dē/ das fein Name billich ein vnsterbliche
 vnd ewige gedechtnuß bey den Nachkom=
 men/ bekoñen/ vnd auch bey vns allen lob
 vnd ehr fol behalten. Plato/ wiewol in vi=
 lem anderē/ ift er doch in dem fürnemlich
 hoch vnd aller ehren werth zů halten/ das
 er vor allen andern/ zů des einigen waren
 Gottes erkentnuß aller neheft koñen/ al=
 fo/ das man jn auch Diuinum, das ift / ein
 heiligen vnd Göttlichen Mann genennet
 hat. Nach diefen beyden ift auch Ariftote=
 les nicht ein schlechter/ fonder furtrefflich
 fter / hochvertendigfter Philofophus/ das
 ift/ liebhaber der Weißheit/ gewefen/ ift
 für allen der höheft gehalten worden/ vnd
 noch vnter den freyē künftē liebhabern/ vñ
 Naturkündigern/ dieweil er alle theil der
 Philofophey (das noch keiner weder vor
 oder nach jm gethan) in feinen Büchern

)(iij vnd

)(4^v

Dem günstigen
 vnd Schrifften (so er Organum genant)
 gründtlich vnd klårlich begriffen. Vnd
 was haltẽ wir von Cicerone? Ist er nicht
 auch der aller berühmteft Redner vnd
 Philofophus gewefen? hat er nicht allzeit
 feine Sachen / vnd was er gethan / dahin
 gerichtet/ das sie dem gemeinen nutzen/
 vñ lieben Vatterlandt/ zũ gutem erfchie=
 fen möchten? Wiewol jhn aber auch die
 Latini/ Parentem Latinæ linguæ, das ift/
 einen Vatter der Latinifchen Spraach
 nennen/ vñ feiner zierlichen wolredenheit
 halben/ fũr den aller beredteften/ fũrneme=
 ften Redner / als er auch werth ift / halten/
 hat er doch auch vnter andern nũtzlichen
 Büchern/ von der Philofophy/ erfor=
 fchung vnd ergrũndung der Weißheit/
 Erbarkeit / tugenden vnd allerhand guten
 fitten / tugentlichen vñ gebũrlichen Wer=
 cken menfchliches lebens / (wie in diefem
 Bũch de Officijs klårlich zũ fehen) nũtzli=
 che vnd fũrtreffliche lehre vnd fchrifften
 hinder jm verlaffen. So denn dife/ fampt
 vielen

)(5^r

Lefer.

vielen andern / dem gemeinen nutzen/ dem
 lieben Vatterlandt/ fo trewlich gedienet/
 die Jugendt in der liebe der Weißheit/ al=
 ler Erbarkeit/ gûten fitten vnd tugenden/
 auch freyen künften/ angehalten/ vnd das
 selbig/ zû befôrderung der Nachkommen/
 mit jhren ſchriſſten bezeuget haben/ ſollen
 ſie billich bey vns ein ewigen Nañen vnd
 gedechtnuß / alle ehr vnd lob/ behalten.
 Wir befinden auch hierin das es war fey/
 das S. Auguſtinus ſpricht: Das man
 auß der Heyden vnd Vnchriften mehr
 denn der Glaubigen vnd Chriſten tugen=
 den vnd wolthaten/ zûr tugendt gereitzt
 vnd bewegt werde. Wenn wir betrachten
 vnd bewegen/ das die/ fo im vnglauben ge
 born vnd erzogen/ aller erbarkeit ſich be=
 fleiffen/ alle billichkeit gefûrdert/ vnd fûr
 augen gehalten haben/ vñ allen tugenden
 vnd gûtem wandel nachkoñen ſind/ dar=
 neben fo ein heilig vnd vnfrâflich leben
 gefûrt/ da ſie doch keine hoffnung der ewi=
 gen feligkeit gehabt/ noch einicher beloh=
)(v nung

)(5^v

Dem günstigen
 nung jrer gütthaten erwarten können/ ja
 auch wol jrer etliche die vnsterblichkeit der
 Seelen nit glaubt/ sondern Leib vñ Seel
 zû gleich vndergehen/ gehalten/ vnd sich
 doch von liebe wegen der Tugent/ keiner
 vnbillichen sachen oder hendeln vnsterfe=
 hen oder vndernemen wóllen. So wir
 deñ dargegen (sprich ich) vnser leben vnd
 wandel gegen jhrem vergleichen vnd befe=
 hen/ sollen vnd müffen wir Chriſten vns
 billich schemen/ das wir in aller leichtfer=
 tigkeit leben/ im lüder dahin faren / keiner
 Tugenden / erbarkeit/ noch billichen hen=
 deln oder sachen vns vnsterfehen nachzû=
 kommen/ so wir den Brunnen der weiß=
 heit vnd aller gnaden/ deffen sie entrahten
 müffen/ vor der handt haben/ das heilige
 Euangelium vnd Gottes wort/ welches
 jnen gar vñ gantz vn bekant/ für augen fe=
 hen/ die hoffnung des ewigen lebens/ vnd
 vnsterblichkeit der feelen/ sampt aller wol=
 thaten belohnung vnd widergeltung/ in
 künfftiger feligkeit glauben vnd zû erwar=
 ten

)(6^r

Lefer.

ten haben. Der ſchanden würden wir vns
 jha ſo nicht aller/ doch eins theils/ abthûn/
 vnd der vnglaubigen Exempel nach/ vn=
 fer leben beffern/ zû tugenden vnd gûtem
 gebûrlichen wandel bewegt/ vnd von aller
 vntugent/ ſchand vnd lafter/ abgefchreckt
 werden. Nûn aber dieſe weiſe / gelehrter
 Philofophi/ vnd andere/ in frembder vnd
 dem gemeinẽ Mañ vnbeanter/ als Gri=
 chifcher vnd Lateiniſcher Spraachen/ jre
 Bücher beſchriebẽ / ſind jre ſchriſſten eins
 theils/ vnd beſonder die von der ſittlichen
 Philofophey/ durch andere gelerten vnd
 der ſpraach verftendigen/ gemeinem nutz
 zû gûtem vñ wolfart/ in vnſere Teutfche/
 vnd andere Spraachen/ bracht worden/
 damit ein jeder/ ſo nicht der ſpraachen/ in
 welchen ſie geſchrieben verftendig vnd er=
 faren/ in ſeiner bekanten zungen vñ rede/
 auß dem brunnen jrer lere/ ſo vil ſeinẽ vor
 haben nutzlich vnd bequemlich/ ſchöpffen
 möchte. Als mir nûn ein vberauß ſchõnes
 vñ nützlichs Bûchlein M. T. Ciceronis/
 des

)(6^v

Dem gũnftigen
 des aller berũhmpfteſtẽ Redners/ von dem
 hochgelerten Johan Neuber verteutfcht/
 fũr die handt kommen/ welches er de Offi-
 cijs, das ift / von tugentlichen vnd gebũr-
 lichen Wercken/ nennet/ darinnen er in
 gemein von allerhandt tugentfamen/ er-
 barlichen wercken/ dem Stand eins voll-
 kommenen lebens/ vnd allen weifen wol
 vnd recht lebenden Menſchen zũftehend/
 leret vnd vnterrichtet/ Hab ichs als einen
 kũftlichen ſchatz fũr die handt genoĩnen/
 lieb vnd werth gehalten/ vnd vor anderm/
 jetzt fleiffiger vnd beffer vberſehen/ wider-
 umb in Truck zũ bringen/ fũr gũt ange-
 ſehen. In dieſem Bũchlin hat Cicero ey-
 gentlich gefetzt vñ begriffen/ was der beſte
 theil der Philoſophen/ als Stoici / Acade-
 mici/ vnd allermeift Peripatetici von den
 gebũrlichen wercken/ gehalten/ welche hier-
 in vor den andern einer rechten meinung
 gewefen. Denn keine beſtendlicher/ nam-
 licher Regel von gebũrlichen Wercken ift
 vnd gegeben kan werden/ denn allein der
 jenen/

)(7^r

Lefer.

jenen/ die da gefagt vñ gesprochen/ das die Erbarkeit durch jhr felbs wurde willen zů begeren fey/ welchs diefe jetztgenante Philofophi lauter vñ eigentlich alfo gehalten. Vnd wiewol viel treffenlicher vnd nutzer lehre in der Philofophey fleiffig vnd vberfleiffig von den Philofophis erfahren find / fo werden doch jre lehre/ die fie von gebürlichen wercken geben vnd geboten haben/ aller weiteft außgebreitet. Denn für war kein theil des lebens/ (das ich der wort Ciceronis brauche) es fey in gemeinen oder eigen/ vor Gericht oder Heußlichen fachen/ oder ob man mit jm felbs oder andern zů handeln hat/ gebürlicher wercken entberren mag. Vnd ift in ehrung derfelben alle erbarkeit gefetzt/ vnd entfpringen auß verachtung vnd verfaumnuß jhrer/ alle lafter vnd vntugenden. Sind die gebürlichen werck/ (daruon Cicero in diefem Büchlein handelt) von jm in 3wo fragen gefetzt / Eins theils gehören fie dem ftand der vollkommen weifen menfchen / Ander theils

)(7^v

Dem gũnftigen
 theils feind ſie gefetzt/ in die Regel / darinn
 alle vbung menſchliches lebens ſtehet/ da=
 hin ſie auch allermeiſt gezogen werden.
 Derhalben dieweil diß alles hierinn vom
 Cicerone/ auß dem grund vnnd brunnen
 der Philoſophey oder Weißeit/ deutlich
 vnd klårlich gehandelt wirdt/ das es auch
 von andern nie gründlicher vñ verftend
 licher beſchriebẽ/ feind dieſe Bũcher Cice=
 ronis von gebũrlichen tugentlichẽ Wer=
 cken/ fũr gũldine Bũcher von den gelehr=
 ten gehalten worden/ das man ſie auch in
 allen Schũlen biß daher der Jugent fũr=
 gehalten vnd fũrgelefen. Ja auch Plini=
 us ſecundus/ da er dieſer Bũcher geden=
 cket / ſpricht / das ſie werth ſeyen/ das man
 ſie nimmer auß den henden legen/ ſonder
 jmmer bey ſich haben / vnd wie ein Handt
 bũchlein bey jhm behalten/ vnd auch von
 wort zũ wort außwendig lernen foll. Diß
 hat mich auch dahin bewegt/ das ich diß
 Bũchlein wider zũ trucken fũr mich ge=
 noñen/ vnnd in ein kleine gemeine form/
 deren

)(8^r

Lefer.

deren sich ein jeder fürderlich vnd nützlich
zû gebrauchen/ bracht habe. Bitte hiemit
den gûnftigen Lefer freundlich / er wölle
sich deffen zû feinem nutzen gebrauchen/
vnfern fleiß vnd mühe / so wir an diß vnd
andere Bücher legen/ zûm besten ver=
fthen vnd auffnehmen/ vnd mit
der zeit beffers von
vns gewar=
ten.
Sigmund Feyer=
abend.

A1^r

Vorrede.
 DER Wolgeboren
 Herr Johannis Frey=
 herr zů Schwartzgen=
 berg/ vnd zů Hohen=
 landtſperg / Als er
 ampts dienft / vnnd in
 fein eigen ſachen mit
 vilerley geſchefften beladen/ jedoch alles
 müffiggehen zůuermeiden/ hat er viler=
 ley (zů anderen gewöhnlichen zeiten der
 rüwe) doch alles allein zů Deutfch ge=
 ſchriben / geſehen vnnd gedicht / Alfo das
 er felten aufferhalb der notturfft / des
 ſchlaaffs vnd des effens / müffig gehend
 gefunden worden/ das er auch deſter
 längſamer ſchlaaffen gangē/ deſter frü=
 er auffgeſtanden / vnd eylender geſſen/
 auch alfo zů der arbeit geeylet/ das er zů
 vilmalē/ nach dem effen/ nicht die auff=
 A raumung

A1^v

Vorred.

raumung des Tifches erwartet/ fon=
 der ein theil des Tifchthûchs von jhm
 gefchoben vnd gefchrieben. Er hat auch
 mit verwunderung gehôrt/ fo jemandts
 gemeldt oder angezeigt hat / jhm fey die
 weyl lang / vnd offft gefagt: Er wolte /
 das es GOTT gefiel / das er vnge=
 fchwecht feiner Natur / weder effen/
 trincken/ noch fchlaaffen / fonder für
 vnd für fchreiben vnnd lefen folt / das er
 auch vnder zeitlichen dingen / für den
 grôften wolluft / treiben wolt/ wie er
 dann aufferhalb diß Bûchs/ fonft vor
 etlichen Jaren/ ein Bûchlein/ das er
 Memorial der tugendt genennt/ auch
 ein Bûchlin wider das zûtrincken/ vnd
 anders ꝛc. gemacht. Darzû noch mehr
 ein Bûch Ciceronis / mit gleicher mü=
 he / verdeutfchen laffen/ vnnd wie diß
 Bûch inn zierlicher Deutfch geftellet/
 vnnd die Bambergifche halßgerichts
 ordnung/ zû der zeit feins Hofmeifters
 ampts dafelbft/ nach rath der Gelertē/
 vnd

A2^r

Vorred.

vnd ander verftendigen zůfammen gebracht/ das alles mit Deutfchen Reimen (zů gůtem bericht) ſchreiben laffen/ bey dem/ feines dienfts vnnd ampts halben nichts verfaumt. Ob nůn alle folche arbeyt/ auß angeborner natur / oder auß gewonter arbeyt/ kommen fey/ ift zweiffenlich/ jedoch das bewuft/ das er auch faft jung/ das Ritterſpiel des ſtechens/ als bey vierzehnen Jaren angefangen/ auch volgendts das Rennen/ auch alle Ritterliche vbung/ vnnd ehrliche krieg lůchung/ alfo pflaget/ das er in folchem allen/ fůr ander/ die grůffe feines leibs / vnnd die mannheit feines gemůths gebraucht vnd bewiefen. Vnd wiewol er auch zů feiner zeit/ ein vber gemeine mannliche gerade Perſon gewefen/ ſo hat doch die natur / ein ſonder eufferlich zeichen an jhm bewiefen/ dann jhm auff allen feinen Fingerknůbeln horn gewachffen / vnnd alfo das er folliche Knůbel / wie die nãgel

A ij an den

A2^v

Vorred.

an den fingern befchneiden hat müffen.
 Vnnd wiewol fonft / viel hörnin gewe=
 fen zů fein / gedicht vnd gefagt / fo glaube
 ich doch/ das wenig menfchen gefunden
 werden/ die fouil horns (außerhalb aller
 negel) als er gehabt. Er hat auch auß
 gefchickter fterck / einen pfenning ftrick/
 daran man pflegt die Kůh zů legen/ mit
 den händen von einander geriffen/ der
 ding inn feiner Jugendt/ Ritterlich/
 Mañlich / vnd vil getriben. Als er aber
 nach dem zwentzigften Jar feins alters/
 mit Ehelichem Heyrat/ zů der Wolge=
 bornen Frawen Kůnigunden/ geborne
 Gråuin zů Reineck gekert / die von per=
 fon gerad / vnd allein vmñ die augen kůr=
 tzer dañ er gewefen/ mit der etliche Sõn
 vñ Tõchter gezeuget/ Jft er zům Heili=
 gen land gezogen/ mit glůck widerkom=
 men / vnd alfo fein wesen Gotsfõrchtig/
 gewiffenhafftig vñ gerecht erzeigt/ das
 folches alles zů fchreiben vñ anzůzeigen/
 lengerung geben wůrd. Dann er bey
 fünff

A3^r

Vorred.

fünff Biſchoffen zu Bamberg/ auch zu
 Würtzburg/ bey einem Biſchoff Hof=
 meifter/ vnd Key. May. vnd des Heili=
 gen Reichs Regiments Rath / ein zeit
 lang gewefen/ Vnd als Brandenbur=
 giſcher Landhofmeifter in Francken ge=
 ftorben/ Auch Welſchen vnd Deutſch=
 en kriegem/ anfehlich befehl gehabt/
 Der ort allenthalben ein liebhaber des
 rechtens/ vnnd ein fürderer des frieds/
 auch ein halfer alles vbels/ fonderlich
 des raubens/ gewalts vnd vnrechts/ ge=
 wesen. Er hat ſich auch vor allem eigen
 nutz/ vnd nemmunge der ſchanckung/
 enthalten. Wie keuchlich er dann gele=
 bet/ iſt aus dem abzuneñen/ Dann als
 ihm nach ſchickung des Allmechtigen/
 vorgeanter ſein Ehegemahel / die er
 gantz hertzlich geliebt/ am zwölfte Kind
 verſcheyden/ vnd ihm acht Kinder ver=
 laffen/ Nemlich Herrn Chriſtoffen/ jetzt
 Bayeriſcher Landthofmeifter/ Herrn
 Paulen/ jetzt Dhomherren zu Cölln/
 A iij Bamberg/

A3^v

Vorred.

Bamberg/ vnd Würtzburg/ auch Herren Friderichen/ die all noch leben/ vnd fünff Töchter / Deren eine ein Klosterfraw/ die ander eim von Sanßheim/ eine eim Freyherren von Sachß / die vierdt / eim von Laubenberg/ die fünfft/ eim von Seckendorff verheyrat worden. Also das er etliche vnnd viertzig Kinder/ vñ Kindßkinder/ auch Kindßkindßkinder/ von feinem leib ehelich geboren/ erlebet/ Hat er ohne zweiffel auß höchster lieb/ die er zů feinem verloren Ehegemahl gehabt/ vnd auß natürlichem wol wöllen folcher feiner Kinder / nicht wider heyrathen/ vnd aufferhalb der Ehe / nicht vnkeufcheit treiben wöllen/ Also von dem fechß vnd dreiffigsten Jar/ biß in das vier vnd fechtzigst Jar/ feines alters / gewißlich kein Weibsbildt / fleischlich erkennt.

Das aber das anfänglich nach verlornem Eheftande / ohn fonder groß anfechtung/ gefchehen fey/ ift nicht zůermüthen.

A4^r

Vorred.

müthen. Deßhalben er villeicht auch
 alfo / wie obftehet/ all rüw vnd müfflig=
 gang vermitteln / Damit er auch den
 frey lebenden willen/ vnd das fleifch be=
 zwungen. Vnnd was arbeyt er fonder=
 lich an nachuolgends Büch gelegt/ wil
 ich züm kürtzften anzeigen/ in allerley
 fchreibung / vnnd hin vnd widerlegung.
 Jft jhm auch das volgend Büch Cice=
 ronis verteutfcht zû handen kommen/
 das jhm feines innhalts/ nach der mei=
 nung wol/ aber der verdeutfchüg nach/
 vbel gefallen/ dann es (wie in nachuol=
 gender Vorred/ auch angezeigt wirdt)
 von worten zû worten/ alfo verdeutfchet
 gewefen/ das der finn dardurch vnuer=
 ftendig gemacht. So aber er dife treffli=
 che tugendt lere Ciceronis darauß ver=
 neñen mügen/ hat er auß fonderer ney=
 gung der tugendt/ diß volgend Büch/
 feinem Caplan (dann er nie kein Latein
 gelernt noch kundt) zû verteutfchen ge=
 beten/ das er Herr Hans von Schwar=

A iij tzenberg

A4^v

Vorred.

tzenberg feliger/ nachmals in zierlicher
 Hochdeutfch gebracht/ vnd das alfo an=
 dern Gelerten/ wider zů vberfehen (obs
 dem Latein gemeß fey) zůgefellt. Der
 gefalt das Bůch mit fampt den Deut=
 fchen Reimen (welche er felbft angeben
 vnd gedicht/) vor etlichen Jaren zů
 trucken geben. Das aber durch nit hal=
 tung/ ꝛc. des Truckers/ durch zeit in zeit
 verzogē/ biß er/ der Herr von Schwar=
 tzenberg/ vnd der Bůchtrucker mit todt
 verfcheyden/ Jft volgends Bůch durch
 ein liebhaber vnd verwandten der Herr
 fchafft Schwartzenberg zů handen ge=
 bracht/ vñ zů vorbildung/ allen des viel
 gemelten Herrn von Schwartzenbergs
 feligen/ feines leibs nachkommen / auch
 meniglich zů tugentfamer erinnerung
 in den Truck (wie hie gefehen wirdt)
 anderßwo vberantwort worden/ Den 1.
 tag Augufti/ nach der geburt vn=
 fers Seligmachers Jefu
 Chrifti/ 1530.

Die

A5^r

Die ander
 Vorrede.
 SO wir nit allein von
 den Heyligẽ Lerern/ der Al=
 ten vnd Newen Ehe/ fon=
 der auch auß weißer Heyden
 gefchriefften/ die tugendt auff das höchst
 gelobt / vnd alle bößheit gehaßt vnd ge=
 ftrafft finden. Sollen wir billich zũ
 vbunge deß gũten/ vnd vermeydung
 aller sũnden vnd lafter/ deßer fleißiger/
 begiriger/ vnd hitziger sein. Derhal=
 ben dann das Bũch/ so Marcus Tulli=
 us Cicero/ von den ämptern der gebũ=
 lichen Tugentlichen wercken (zũ latein
 Officia genant) gemacht / hochgelobet
 vnd gepreißt wirdt. Wiewol nũn das
 selbig Bũch / vormals auß Lateinischer
 spraach/ in Teutſche zung transferiert
 vnd verwandelt worden ift/ So haben
 doch dieselben verteutſcher als gar na=
 A v hent/

A5^v

Vorred.

hent/ bey folchen Lateinifchen worten
bleiben wöllē/ das dardurch jr verdeut=
fchen/ zier vnd lufte zů lefen/ auch an vil
orten rechts verftandts / falt manglet.
Darum̃ der wirdig Herr Johañ Neu=
ber Caplan zů Schwartzenberg/ auff
beger des Wolgebornen Herrn Johan=
fen Freyherrn zů Schwartzenberg/ der
zeit Bambergifchen Hofmeifter/ zů for=
derft/ Gott zů lobe / auch vmb gemeines
nutz vnnd befferung willen Teutfcher
Nation/ das obgemeldte Lateinifch Ci=
ceronifch Bůch / gantz newer ding / von
finnen zů finnen/ vnd nicht von worten
zů worten/ verdeutft hat/ dem auch
von mehrer vnd befferer merckung vnd
behaltigkeit wegen / etliche Deutfche
Verblein / wie darinn funden werden/
zů gefetzt feind. Das alles vollendet
ward / im Jar als man nach der geburt
CHRifti vnfers Seligmachers zelet/
Fünffzehenhundert vnd im Zwentzig=
ften.

Vnd

A6^r

Vorred.

Vnd nach dem je zů zeiten vmb
 beffers verftandts willen/ vnder dem
 Text kurtze gloß eingemifchet werden/
 folche gloß wirdt zwifchen zweyẽ Ster=
 nichen funden/ Jm anfang/ mit einem
 g* vnd am ende mit einem *t gezeich=
 net.

Bey dem allem ift zů mercken/
 dieweil eins theils Rõmifcher åmpter /
 der etliche offft in gemeltem verdeutfch=
 ten Bũch berũrt werden/ difer zeit nicht
 in vbung oder wafen fein/ vnd einem je=
 den folchen nammen/ mit einem oder
 zweyen worten/ on weytere außlegung
 vnd vmbfchreibung/ kein bequemlicher
 vergleichlicher Deutfch/ gegeben wer=
 den mag/ Das darumb die namẽ der=
 felben åmpter / an allen enden / wie fie in
 gedachtem Bũch ftehen / vnuerwand=
 let gelaffen. Aber was eins jedẽ folchen
 ampts eigenfchafft bey den Rõmern ge
 weißt/ vnd durch Pomponium Letum/
 in Lateinifcher fpraach kũrtzlich befchri=
 ben

A6^v

Vorred.

ben vñ außgelegt worden/ Jft durch ge=
nanten Herrn Johann Neuber/ auch
nach kurtzer meynung verteutfchet/ als
hernach volgt.

Nañen etlicher Rômi=
fchen âmpfer / vnd derfel=
ben eygenfchafft.

Senatores.

Romulus hat nach anfenglich=
er erbawung der Stadt Rom / erft=
lich zû dem Rômiſchen Regimēt /
hundert erwölt/ die Senatores genāt
wurden/ die auch die Rômer Patres,
oder Vätter hielfen/ Aber außwen=
dige leut/ hielten vnd neñeten die/
Fürften der Rômer.

Patres Conſcripti.

Patres conſcripti feind andere (die
gedachten hundert Senatoribus als
helffer zûgegeben waren) genañt
worden.

Senatus